

## Christian Wissmann

Jetzt muess i no öpper verabschide, wo für üs u aui bis-  
hörige Grossrät u Grossrätinne über 28 Jahr usseror-  
dentlich wichtig isch gsi, üse Ratssekretär, dr Dr. Chris-  
tian Wissmann, er wird üs uf Aendi Mai verlah.

Liebe Christian, du hesch fasch dis haube Läbe em Kan-  
ton Bärn, em Grosse Rat, em Parlamänt dienet u i dere  
länge Zyt dr Gross Rat u d'Qualität vo de Beratige u de  
Vorläge wäsentlich mitprägt mit dire grosse Fachkompe-  
tänz, dim Isatz u dire agnäme Art!

Irgendwie het dr Christian Wissmann gloub  
d'Kantonspolitik im Bluet, er het nämlich bereits sini Dis-  
sertation em Thema "Gibt es eine Krise in der Gemein-  
depolitik?" gwidmet. 1981 isch är de ir Staatskanzlei  
agsteut worde u het so wichtigi Ufgabe überno wie ds  
BUK-Sekretariat zu de Beanstandige vom Rudolf Haf-  
ner.

Im 90i isch er de mit de auerbeschte Empfähliche zum  
Ratssekretär gwäut worde. Sit denn het är sech bedin-  
gigslos i Diensch vor Sach vom Grosse Rat gsteut u  
sech derbi engagiert für ds Parlamänt u sini Alige u  
Rächt igsetzt. Er het sech aber o usserhaub vom Büro  
mit em Thema Parlamänt befasst, so isch er Vorstands-  
mitglied vor schwizerische Gseuschaft für Parlamäntsfra-  
ge u Mitglied vor Projektleitig vor Inträssegemeinschaft  
Kantonparlamänt. E Grossrat het ne mau träffend aus  
ächte Fän vom Parlamäntismus bezeichnet.

Vor däm Hingergrund het är üsem Parlamänt wichtigi  
Astöss gä:

Unger sire Projektleitig isch dr Kanton Bärn 1995 dr erscht gsi, wo e elektronischi Abstimmigsalag het igfüert.

Es angers Bispiu isch d'Ifüerig vo NEF, wo er aus Sekretär vor Umsetzingskommission ungersuecht het, was di'Ifüerig vo NEF ir Verwautig für ds Parlamänt u sini Rächt u sini Ufgabewahrnahmig bedütet. Er het de di entsprächende Reformschritte initiiert u umgesetzt.

So quasi im Courant normal het er meh aus es Dutze Parlamäntsrevisione für ds Büro betreut, für 67 kantonal Abstimmigssunntige ds Abstimmigsbüechli mit ca. 171 Abstimmigsvorlage organisiert, koordiniert, konzipiert u teilwis vorbereitet.

Schätzigswis 80 Antworte für parlamentarische Vorstöss zu de verschidenschte Theme erarbeitet, öpe 10 Kommissionen begleitet wo sech mit parlamäntarische Initiative befasst hei – i chönnt no viu ufzeue...

Näbe sire Kompetänz u sim Fachwüsse het är sech dür sis Engagement u Inträsse gäng wider neu uszeichnet. O nach langjähriger Tätigkeit he är sech gäng wider gärn nöie Fragestellige gsteut, was sini Umgäbig mängisch mit Stune quittiert het.

Nach sire Wau aus Ratssekretär het er aber näbem fachliche ono ds Team u d'Dienschtleischtige vom Ratssekretariat ufbouet. Dr Christian Wissmann verkörperet für mi der Stabsmönsch par excellence: Sini Kundinne u Kunde her er immer mit Respäkt u Hiufsbereitschaft behandelt u jedes mau versuecht, di beschtmügliche Lösung für ihri Alige z'finge – um was es o immer gange isch, es paar säutsami Sache dörfts i dene 19 Jahr sicher drunger gha ha. O hie zeige sechs si Respäkt u sini Diskreti-

on, nach usse het's nie es negativs Wort oder e Bemerkig gä.

Bi au däm Isatz u dene Leischtige isch er praktisch immer im Hingergrund blibe. Gäge use, sigs ir Oeffentlichkeit oder während de Sessione isch er chum einisch sichtbar i Erschinig träte.

O grad drum isch es mir e bsungeri Freud, ihn hüt einisch aus Houptpärson dörfe z'würdige. I mim Präsidiaujahr u o bereits aus Mitglid vom Büro hani sini Qualitäte usserordentlich gschetzt. Was hät i i mim Prasidiaujahr ohni sini überleite Ratschläg u sini Ungerstützig gmacht?

Liebe Christian, jetz hesch du di entschide, vo der Müglichkeit vor freiwiuige Früepensionierig Gebruch z'mache um Zit für nöii Ufgabe u Inträsse z'ha.

I danke dir im Name vom Grosse Rat für di gleischteti Arbeit, di Isatz, dini grosse mönschliche Qualitäte, wo du i üse Dienscht gsteut hesch. Mir wünsche dir u dire Familie für e nöi Läbesabschnitt vo Härze aus Guete, Gsundheit, viu spannendi nöii Erfahrig u Ufgabe u natürlich viu Spass bim Sport, für dä de ja jetz de me Zyt söttisch ha – Danke.